

國方志叢書·華中地方·第八一號

據

清·陳蘭森等修，謝啓昆等纂
清乾隆五十四年刊本

影印

江西省

南昌府志

(三)

成文出版社有限公司印行

南昌府志卷十一

山川 六 津梁二

奉新縣

南津渡

在縣南三百步卽橋南渡

以下皆本縣志故不重載

富陽津渡

在縣西一里卽上場頭渡

中渡

在縣西三百步

東津馮田渡

在縣東二里

洗菜灣渡

在馮田渡下

延平觀渡

在縣東二里建康鄉

三溪渡

在縣東北十里建康鄉

候龍渡 在縣西十里奉新鄉相傳許旌陽候蛟於此

唐家灣渡 在縣東二十里

磐山渡 在縣西二十里漢劉磐駐兵之地

童家渡 在縣西五里建康鄉

譚埠渡 在縣西二十五里新興鄉

張坊渡 在縣西二十七里

會埠渡 在縣西四十里

會坊渡 在縣西四十五里

招賓渡 在縣西五十里

馬投渡 在縣西五十里

陰村渡 在縣西五十五里進城鄉竹溪羅姓歲築

管埔渡 在縣西五十五里

羅坊長灘渡 在縣西六十里

富溪渡 在縣西七十里奉化鄉一名上富渡

通化橋 在縣西五十步宋元祐八年縣令廖擇玠建元

季毀明洪武庚午擇之孫賢淑捐資重建永樂戊子擇九

世孫野航天順二年擇十一世孫子美成化五年擇十二

世孫大耕嘉靖己未十五世孫本繼世修之

吳彥宏記曰南昌之屬邑惟新吳爲最馮川蔽其陽其地
有高山峻嶺嘉樹美箭環列乎左右邑之西數十步有溪
焉上有橋曰通化橋也橋上有亭商賈咸集奇葩異果南
金珠璣魚鹽屠販紛然雜出乎其間日中爲市以濟上下

之民以建百里之通以通一邑之化也故曰通化橋予時
署茲邑事而往過問之人曰是橋也由宋元祐間有姓寥
氏名擇字從善者衡州南岳人也授佐宣德郎領茲邑令
居職三年考最復任每公餘往來於溪之濱見民有徒涉
之患故意有所適乃曰是可橋也遂捐已俸備石梁創而
新之元祐八年橋成以屋覆其上秋滿將去民懷其惠願
挽留而不可得令遂命其幼子於橋之西津南畔家焉於
是里邑之士咸悅而稱之爲宣德小三郎顯白當世光照
於今厥後橋累因兵燹化爲灰燼其八世孫有字賢淑者
廼於洪武庚午之歲命長嗣鵬用捐金傭匠橋宇一新永
樂戊子時又風雨損焉九世孫野翁復命十世孫永齡永
孚復葺而新之美哉輪奐是可記也噫斯橋也微宣德不
能成斯橋利濟之盛微斯橋又豈能著宣德政績之嘉哉
今其子孫又能以宣德之心爲心而繼志述事於悠久吾
知其惠澤之及於人者深矣則廖氏之子
孫又豈有不昌大者哉故述此以爲記

國朝乾隆三十四年擇二十一世孫際斯重修

天津橋

在縣西北宣化坊舊名鎮城橋明宣德十年知

縣璩鎮海建一名上市橋今廢

南津橋 舊名安固宋胡用之建

楊億記曰昔鄭子產以乘輿濟人不知爲梁之利薛廣德以樓船涉水不若從橋之安孟軻稱其仁班固紀其直是知橋梁之利以濟不通其所由來者舊矣豫章邵三吳之都會奉新縣五嶺之要衝長江瀕洞以東流橫橋遠邇而南渡先是邑人胡氏出家財而營創也太平興國中山源漲出長風架浪巨石磅礴以相摧大木軒昂而雜下所值者立爲齏粉所赴者蕩然藩籬兩崖之間不辨牛馬一邑之人將化魚鼈斯橋飄蕩無遺餘焉自是邑人以艇數艘用濟行李結駟挂轄殆無虛日鳴榔鼓柂疲於奔命伍胥既爲之解劍陳平亦佐其刺船羈遊者攬轡而躊躇負販者臨川而歎息亭長艤舟而不渡樵人取箭以空回往來患之非一朝矣然而工築至大用度實繁縣吏不敢賦於人居民不肯一其力胡氏慨然奮發蔑以家累將續嗣於前勞乃經營於不日以時斬木必取梗楠之良捐金構匠聿求班輪之巧積百車於斷岸礮一拳於他山前施樸斲之功預成締構之用及窮冬之水涸未踰月而橋成奐乎

維新流若化制度之宏壯已數倍於曩時基局之固護
必可致於悠久疇昔之興工僅彌年而事集今茲之經營
未改火而役收致茲神速出於神明又何必廣表倍於
常蔓延幾乎百步蜿蜒平視若牽牛之渡河天矯亭驤若
黑龍之飲渭足使行李似安於枕席王命不壅於置郵臨
九江不待駕以鼉鼉期七夕不待填以烏鵲招招舟子悉
扣舷鼓櫂之歌憧憧行人絕濡軌褰裳之患計功稱大其
博施濟衆之謂乎昔齊人延年願壅水以注匈奴惜其志
大而無用始平人宗士美親負米以委太倉嗟其惠小而
不孚胡氏代被聖化從容素域腴田力穡鄉里息虞芮之
爭方領高冠子弟成鄒魯之俗歲若小歉則爲淖糜以活
人官或仰屋則出紅粟以助國江左高義天子知名乃杜
緩之出邑金資討西羌卜氏之輸家財助平南越蓋其比
也又豈滔滔鷄浪非一葦之可航哉我虹梁有千金之浩
費括囊揭產之不顧善利既濟之爲心者哉胡氏義君數
世以上以孝懿著聞詔有司旌表其門閭俾本郡給復其
徭役授其家老仲堯州助教以寵之又改國子監主簿致
仕其弟仲容以兄命詣闕賀壽特授秘書郎後遷光祿寺
丞晏公稱其折券絕飲羊之欺望廬消得鹿之訟愛人利
物趨若嗜欲至若縣學佛寺道觀皆其所創南津石梁固

其利濟之本心也於是乎記

元王交炳重修易名惠政

吳澄記曰新吳豫章郡之屬邑也有水橫貫於邑之中曰馮水馮水之源出百丈山行百有餘里及邑之西其流分而爲二經流在北遶邑治之南而東支流在南徑南市之北至邑之東而與經流合二流各有橋梁以渡水勢漂悍橋不能支屢修屢壞南橋之袤踰二百尺而北橋之袤殆七十尋故其壞尤數其修尤難宋初邑大家胡氏架木爲梁太平興國中胡之家有國子簿仲堯嗣新之其弟秘書省校書仲容請於楊文公億爲之記名其橋曰安固於後改作浮梁而易其名曰安濟淳祐間浮梁敝進城鄉羅鑑暨奉新鄉王珣率諸大家合力結爲墩至慶元末石墩亦敝邑之令佐用民力監木爲柱置板於上而易其名曰行教財力夫力一皆取於民九皋王德全珣之元孫也輕財重義克蹈祖武視役戶歲遭督責之苦役夫時被鞭箠之虐惻然興憐遂以修橋爲已任大德戊戌捐貲造新橋五十餘丈不藉勢於官不假力於衆明年春爲水所壞則造二舟以濟至冬復完其橋自後輒壞輒修不以其事諉官

府買進城鄉杉林數百畝長養其材爲久遠計乙巳相視
水勢平緩之處於橋之上流二十步兩崖疊石重構新橋
廣袤一仍其舊其將終也遺命囑其子文炳兄弟勿墮前
勞以田租六百石及進城杉林專備修橋之用延祐甲寅
橋又壞文炳兄弟又造二舟以濟至冬又成新橋其南橋
舊名惠政大德以後修理一出王氏之力至是南流漸微
乃用七千餘力運上石實築悍道壅水北流南橋旣廢得
以萃其工力於一橋而移彼惠政匾易此行教名邑人咸
喜求予文記其事予謂古以除治橋梁爲官政而今亦然
但官無可用之財而爲民是資則惠未及民而厲先及之
矣王氏以一家獨任其功俾官不勞心而得惠政之名民
不勞力而蒙惠政之實可謂賢矣且人之好助修橋者固
有之然能同於衆鮮能成於獨也能爲於暫鮮能力於久
也竊聞大德以逮於今橋之廢而復修者五每一興役用
木不翅千株用工不翅千人而用財計楮幣鉅萬其間水
所摧殘或比年一修或半年一修其費又在此之外方將
世世繼述而無倦嗚呼其孰能有此肯心者哉德全字義
甫生平好施調恤鄉隣之事不一賑饑賤糶該受賞典則
以老辭將官其子則仲子文炳叔子文謨俱讓而以俾季
子文傑仁讓之德如此王氏之昌其未替乎昔也胡氏種

德而二子並膺朝職子若孫登進士科者八九王氏之種
德如胡氏天將不以報胡氏者而報之乎王氏孫其益思
所以善繼
善述哉

元末毀明移學宮謂橋不宜出學右遂於洲下改建馮川
橋乾隆十一年邑人倡募於故處修復功久弗就

馮川橋 在縣南門外去舊南津橋二百步許爲一邑要

路元末南津橋毀官爲置渡以濟明宏治十七年邑人徐
金捐資斲石爲梁

李恕記略曰馮川自南津橋廢官爲之立渡舟往來舟易
壞民又自爲私渡舟子多頑悖乘時射利每春夏間洪水
泛溢奔走爭舟者不無傾覆跳躡之患時將寒互雖架竹
木爲橋民終不免徒涉之病甚至官府經臨是邑亦且停
車問津前後主是邑者欲用心於此而公帑無羨餘民力
多苦艱遲延至今有由也是歲義民徐金目擊心難不待

上命慨然發財鳩工琢石以造之其事顛末上之郡侯祝公深嘉其俠義輕財濟人利涉因命匾其名曰義濟帖縣重加作興以成其美遂以宏治甲子七月起工迄於正德丙寅九月落成於梁四十六道其長五十六丈五尺高六尺五寸濶三尺大略用工二萬有奇銀一千餘兩徐君諱金字若重號拙軒乃逸民與正之孫壽相學耕之仲子永樂辛卯進士應奇之姪也其子曰淵曰泮其孫曰槐曰國華曰杰皆能克世其家者也因書以記之

嘉靖初梁圯金族子道濟復捐金重修易名紹義隆慶間洪水衝沒知縣陳雋修理萬厯二十一年復圯邑人胡士琇捐資復建易今名

知縣馮燧記略曰馮川古邑也楚霸王宰割鴻溝徙吳中豪東馮氏於海昏得名而其以西源於百丈大雄雁橫石陰村越山熊嶺浮雲華林諸山水而經流於故縣磐山北環今治獅山之南東至洪田後合同安之黃沙至義興合從善之乾州以赴九江而入海今磐山東爲馮塘而獅山下有馮井縣之東南門與東岡皆爲馮田名則皆馮川遺

也川之有橋始宋景德間邑監簿胡仲堯寺丞仲容則橋
文公億南津橋記可讀也在蛾眉洲上爲儒學下沙及以
惠安寺基改學而橋出學右義旣無當橋亦就圯宏治間
邑人徐金改建洲下則縣與學皆出橋右而洲沙日長兩
流夾射橋遂善其東直馮田門水恬少抱包孕更廣似有
造於民風士氣者則橋之不可不改建於馮田門也馮子
初下車則驗之顧事重未敢輕議仲容氏裔孫士琇慨然
成其祖志復捐千餘金成之橋凡三十六洞址視舊高疊
石六面視舊增梁石二十中十洞視舊皆一當兩以納
衝湍而北五洞深之得石底遂舍椿復加三疊石

國朝康熙四十八年再圯邑人彭良京捐修後圯於水乾隆四
年良京孫彭涵復又捐銀伐石鼎建每墩高一丈長一丈
九尺闊九尺共二十七墩較前益爲完固

巡撫陳宏謀記曰今
上御極憫念天下行旅艱難

詔所在橋梁道路宜修置者發帑治之有樂善捐建者視其所
費大使奏請從優議敘歲辛酉余撫江右遵奉

諭旨於會城南創立浮橋以濟民咸稱便因飭屬邑修缺補廢以仰副

聖天子德意適奉令張天謨來謁詢該地津要狀令曰邑南渠川橋京廣要津也昔當春夏暴漲浩蕩掀翻水與梁平泛梗糾蒲挾梁以去石相碎墩亦星落病涉者屢矣在籍紳士候選同知彭涵者偕弟貢生浩呈請專以石成之前令聞於上憲報可遂鳩工礱石經始於乾隆四年八月全九日落成於五年三月六日計時約八月約費鏹幾千兩蜿蜒蟠亘垂虹列雁履之者若坦途然咸嘖嘖彭子之功不衰余曰嘻是舉也以一人而利萬衆可不表以風世哉令曰茲橋也是非始於彭子兄弟也彭子之祖良京曾修之捐金五百有奇父昂祚又思繼修之而促於年未竟其事今若但承乃祖乃父之志耳表以風世若不欲專其美也余曰然則彭子更不可及矣夫不煩內帑義也克承先志孝也使人不病涉仁也能孝而仁義備可多得乎乃爲咨於制臺會題得蒙

溫旨優敘庶彭子自此傳而彭子之祖父亦與俱傳使西江人士觀感興起俱各破吝疏財勉於爲善豈不休哉余故樂爲之記令壽諸貞珉又以知彭子他日居官卽是心而廣之則凡裨國計而益民生者可於斯覘其概也

登仙橋 在縣河南市登仙坊相傳劉道成於此上昇故名

楊公橋 在縣河南宋縣令楊萬里創故名

澄心橋 在楊公橋之南邑人王景葵修

馮田橋 在縣東三里岐山下明正德十五年知縣梁幹

率邑民吳德清等創建嘉靖十五年知縣胡億修

通濟橋 在縣治北門外明正統九年邑人周節文建俗

呼爲中市橋通靖安武寧寧州路

周文盛記略曰通濟橋在邑治東北之淳厚里俗呼爲中市橋舊以木橫跨兩岸上皮以板以通行者然地當靖安寧武三邑之衝行者往來相屬於道厯歲滋久雖或修治而木與板易朽尋復蠹壞莫支恆有傾覆之患人甚病之

里之巨姓周節文甫遂慨然歎曰橋梁所以濟不通而利
病涉者此橋實當孔道又非窮鄉下邑之比吾坐視其廢
可乎於是召匠募工而籌其所費乃伐石於山負灰於筠
舟舉而輦致之至則累石爲址甃爲三洞洞各修一丈二
尺廣十丈一尺兩崖實以灰爰築爰甃堅緻完固莫窺罅
隙坦然由之無復向時之虞矣計用攻石之工若干傭人
之工若干食工匠暨百役之爲米若干石始事於正統
年十月甲子迄工於明年二月庚申凡五閱月始告成知
縣事四明袁侯彰率僚吏暨一邑
縉紳之士各舉酒於橋以觴之

下市橋

在縣治東北百步餘今廢

和豐橋

在縣治東北舊名朝京橋通建昌縣路宋邑人

袁安創淳熙五年知奉新縣王正邦重建易今名

袁去華記曰國家都大梁時奉新爲荆粵孔道跨北道爲
朝京橋舊矣祖父始創爲橋亭七間歲久將傾去華嘗修
之亡何當官者勇爲修陂濬河既深橫柱日危橫流暴至
橋遂斷裂尺椽片瓦蕩無存者工鉅難舉滋閱歲月淳熙

丁酉仲秋四明王君正邦來爲邑宰既三月政成民和百廢具舉一日過去華問橋興廢始末去華識公意具告之故公乃命兩僧董役率僚屬倡以已俸人爭趨之事半功倍越明年七月橋成僧築兩崖下植護柱繚以欄楯飭以丹堊規模之壯輪奐之美遂爲當道偉觀兩僧請以公姓易橋名將刻諸梁公曰吾官於此補漏支傾恐爲爾民是賴今成此橋若輩之功也吾何與焉矧求名非吾志也惟奉新土瘠而賦重嘗得豐歲猶可爲治遇水旱愈不堪矣橋之成也歲適大稔吾將更其名曰和豐豐言天和言人使爲政者致力於人以求必乎天則自今以始可以傳之無窮邑士民耆老奉公之意踵相接於門請余爲記余謂天人相與事遠而甚邇區區於繁文而責報於天屑屑於小惠而求媚於人心勞日拙反而求之愛人之心形於屋漏暗室之中而民氣和於耕桑隴畝之上至和之氣集於飲食之際而天意格於恍惚茫昧之間造端甚微其意宏大多余觀公之爲政操縱取舍不可窺測事至而應無所容焉是故予者不喜而奪者不怨始至請於太府豁其逋租而新是圖寬與之程而信期之興學校謹教化尊德而尙齒嘉善而矜不能時其婚姻而賑其貧乏恤其死喪而哀其孤苦凡兩漢循吏之所以爲艱而僅能者公率意爲之

初不求媚於人而歌頌之聲足以消沴氣初不責報於天而雨暘之時足以成豐年橋成而揭斯名可謂得其實矣昔杜預建橋而其君賞之以爲功薛惠不修橋而其父病之以爲不能與梁之政亦古人所致意而不敢忽者抑聞之韓宣子聘魯魯享之賦角弓示親也既享晏於季氏而譽其嘉木武子爲之賦甘棠曰宿敢不封殖此木以無忘角弓公於其邦愛利之教誨之不啻父兄於子弟焉豈但若宣子賦詩以示其志者修橋之舉侈於一木其屬意成之過於一舉願爲我公記爲後日甘棠之思去華旣自恨不能嗣先志又無辭以御邑人之誦遂爲記公字榮甫桃源先生之後好學善詩尚氣節爲吏守家法不肯取合時好蓋其天資云

元至元二十八年邑人譔季塾重修後復燬明正統間邑人熊蘭芳砌石橋俗呼爲下市橋

通城橋 在龍山之西邑民周應南建今廢

京思陂橋 在縣北二里